

四庫全書

史部

欽定四庫全書

欽定八旗通志卷一百二十六

人物志六

宗室王公傳四

和碩德豫通親王多鐸
多羅信
郡王多尼
原封多羅貝勒察尼

和碩德豫通親王多鐸

多鐸

太祖高皇帝第十五子初封貝勒天聰二年二月與同母

兄多爾袞從

太宗文皇帝征察哈爾多羅特部大捷俘獲萬餘

車駕將還瀋陽途中宴從征將士

賜多鐸號額爾克楚呼爾三年十月復從征明由龍井關入
同貝勒莽古爾泰多爾袞以偏師圍漢兒莊城降之
遂會大兵克遵化進薄京師明寧遠巡撫袁崇煥錦
州總兵祖大壽以兵二萬來援屯廣渠門外諸貝勒
敗之多鐸以年幼留後明潰卒來犯擊却之十二月從
上閱視薊州形勢明山海關援兵五千距城二里許列陣

多鐸同諸貝勒擊敗之五年七月

上征明大軍抵大凌河夜圍其城正白旗都統喀克篤禮
率本旗兵圍東南之壯多鐸率護軍兵為策應又
與大貝勒代善等率兵三千以礮攻克明近城臺
保九月明援兵七千出錦州拒我前鋒於小凌河
岸

上以兵二百馳擊敵潰遁多鐸追至錦州墜馬馬逸入敵
陣乃乘小校扎福塔之馬而還越十日明援兵四

萬距大凌河十五里列營多鐸從

上擊敗之十一月與貝勒濟爾哈朗等率兵三千五百往
塔山東阻截邊海隘口俘百餘人六年四月從征
察哈爾林丹汗遁大兵分路前進多鐸與濟爾哈
朗多爾袞等率兵略歸化城西南黃河一帶俘衆
千餘八年五月復從征明七月與阿濟格貝勒等
率兵自巴顏珠爾格入龍門遇明兵敗之又奉

命率兩黃旗每佐領兵五名往略保安州攻克其城殺其

守備會大兵於應州謁

上籍俘獲數以

獻八月往略朔州東至五臺山還從

上擊敗明兵於大同城南九年二月

上命貝勒多爾袞等征明山西五月

諭諸貝勒大臣曰出師諸貝勒此時想已入明境明必調
寧遠錦州兵往援我兵今當入寧錦界立營使彼望見
我軍以牽其救援之兵遂於每佐領選護軍二人以多

鐸為帥艾度禮阿格等輔之入廣寧境遣副都統
阿山石廷柱叅領圖賴吳拜郎邱察哈爾等率兵
四百先驅多鐸率大兵繼進逾十三山站立營明
錦州總兵祖大壽令副將劉應選穆祿吳三桂等
率兵三千五百迎探大壽駐營錦州城外五里時
明將劉成功趙國志率兵八百與應選等合兵至
大凌河西與我兵遇阿山等以敵數馳報多鐸多
鐸遂率所部馳赴飛塵蔽天明諸將見我勢銳大

驚奔潰阿山等四百兵突入掩殺兩路追擊斬應
選殲敵兵五百擒遊擊曹得功及守備三員獲馬
匹甲冑無算距錦州松山城五里收軍還翼日復
攻克一臺回駐廣寧邊境旬餘乃還

駕出懷遠門五里外迎勞多鐸獻陣獲官將及所得軍器
馬匹

上以多鐸初專閫外能出奇制勝嘉獎之

賜良馬五甲五崇德元年四月晉封和碩豫親王六月

命掌禮部事八月與睿親王多爾袞等征明分兩翼王率

左翼兵由錦州入降胡有陞等由義州還十二月

上親征朝鮮遣戶部承政馬福塔等率兵三百為前鋒多

鐸等由沙河保領兵千繼之至其都國王李倬棄

國遁我兵踰城入城中軍士奔竄追之四十里至

南漢山城環圍之朝鮮臣在外者聞其主被圍率

兵二萬餘先後來援屢擊敗之迎

上駐城西獻所獲馬械

命分賚有差二年正月大兵北渡漢江營江岸距王都城

東二十里許朝鮮全羅忠清兩道兵來援列營南

漢山

命多鐸率兵往視天方雪陰晦敵營依山而陣我兵進擊

敗之追至山巔還詰旦復率兵進朝鮮兵已拔營

夜遁收其馬千餘二月朝鮮降乃班師三年二月

從

上征喀爾喀多鐸率本旗護軍兵及土默特兵從寧遠錦

州間進發大兵從義州一路進發多鐸將入邊俘
斬哨卒十餘攻克桑阿爾齋舊居之大興堡斬守
備一及壯丁二百俘其戶口道擒大壽所遣二諜
以歸九月

上至演武場送睿親王征明王以目疾甫愈不至

詔侯睿親王班師議罪旋

命率所部兵往中後所助鄭親王濟爾哈朗十一月將過
中後所大壽以兵來襲傷我兵九人掠馬三十王

且戰且退殺敵三十人夜達鄭親王營翼日合兵
至中後所

上統兵至敵不敢出四年五月議前不送出師及中後所
失士馬罪降多羅貝勒八月

命掌兵部事十月同肅親王豪格征明錦州寧遠敗敵於
城北山岡斬總兵金國鳳及其二子五年三月奉
命與鄭親王分統左右翼兵往義州葺城屯田逾月畢工
墾田東西四十里五月蒙古多羅特部蘇班岱等

駐杏山西五里臺密乞內附

上命多鐸與鄭親王等率護軍兵千五百往迎之夜過錦州城南至杏山携其貲畜以行黎明松山總兵劉周智列兵環松山錦州兵續至與周智合逼我軍多鐸與鄭親王等進擊敗之追勦至城下斬副將楊倫周叅將李得位等獲旗纛馬匹盔甲還

賜多鐸御廐良馬一十一月圍錦州夜伏兵桑阿爾齋保旦敵至敗之追至塔山斬八十餘級獲馬二十六

年三月復同鄭親王圍錦州收其守郭蒙古將諾木齊等屢敗明兵松山杏山間事俱詳鄭獻親王傳八月明總督洪承疇會八總兵以兵十三萬援

錦州

上親統大軍臨之自

盛京馳六日環松山而營明兵大驚八總兵等宵遁上命多鐸設伏明總兵吳三桂王樸率兵從杏山奔寧遠我前鋒兵自杏山西追擊至高橋伏兵起夾攻之

斬殺無算三桂樸僅以身免九月

上旋蹕

命多鐸與諸王更番圍松山城内兵夜出犯我鑲黃旗營
我兵擊敗之斬級千餘獲礮五十七十一月承疇
自松山城出兵六千夜犯我正紅正黃二旗營我
兵依汛沿濠射卻之殪四百餘人七年二月明松
山副將夏承德密約內應以其子夏舒為質夜半
梯登南城生擒承疇及巡撫邱民仰總兵王廷臣

曹變蛟等七月叙功晉封多羅豫郡王十月以貝勒阿巴泰為奉命大將軍由黃崖口征明薊州

命王與郡王阿達禮等屯寧遠邊境牽制明寧遠援兵至則遣人入略俘百餘人敵出戰敗之多獲牲械八年四月因聖躬違和有事祈禱疏言兵者不得已而用今日之勢宜暫息兵至國中興作俟規模既定後舉行但當以農務為急農務克勤則庶民衣食豐足衣食豐足則舉國慶豫舉國慶豫則

朝廷膺無疆之福而

聖躬永享安和此後舉行未晚也順治元年四月從睿親王多爾袞入山海關破流賊李自成定燕京十月晉封和碩豫親王時明福王朱由崧自立於江寧設江北四鎮扼淮徐為割據計十一月

命多鐸為定國大將軍統師南征值河南秦流賊肆掠詔先剿賊河南十二月至孟津遣護軍統領圖賴先渡黃河流賊偽都司黃士欣果毅將軍張有聲潰遁沿

河十五寨保望風歸附睢州明總兵許定國玉寨
首領李際遇等率衆來降大兵至陝州賊將張有
曾屯靈寶城外我軍夜襲敗之師距潼關二十里
立營俟紅衣礮至進攻賊將偽汝侯劉宗敏據山為
陣我前鋒統領努山鄂碩等趨破之圖賴復率
騎掩殺甚多宗敏遁二年正月賊將劉方亮犯我
營被我兵擊敗自成親率兵迎戰我軍協力並進
殲其步卒賊騎奔復連夜來犯俱敗之既而紅衣

礮至進逼潼關賊鑿重壕立堅壁以拒遂發巨礮
攻之我師相繼衝入殺賊無算賊又以騎兵三百
橫衝我師貝勒尼堪懷順王耿仲明貝子尚善等
躍馬夾擊敗之賊又分兵躡我後蒙古都統恩格
圖領殿後軍破之諸軍連勝殲賊營精銳殆盡自
成喪魄走西安僞守關吳山伯馬世堯率所部七
千餘降獲馬千餘匹輜重兵甲無算師入潼關獲世
堯所遣致書自成者三人併世堯斬以徇越二

日至西安自成已先五日焚宮室挈子女輜重出
藍田竄商州南走湖廣遣護軍統領阿爾津等追
之不及而還二月捷

聞

諭曰聞爾等破流寇於潼關遂得西安不勝嘉悅初曾命
爾等取南京今既破流寇大業已成即將陝西事宜交與
靖遠大將軍和碩英親王等爾等即遵前命趨南京大
丈夫為國建功正在此時汝其勉之三月王率兵抵河

南偽平南伯劉忠迎降兵出虎牢關分遣都統拜
音圖等出龍門關尚書漢岱副都統伊爾德侍郎
尼堪等統外藩蒙古兵出南陽三路同趨歸德州
縣望風投順所至撫兵民設官屬疏請速鑄給印
信以防詐偽從之

諭獎其方收關陝旋定中原勦寇安民勲庸茂著

賜寶飾刀鍍金鞵帶四月自歸德趨泗州明守將焚橋遁
我兵夜渡淮遣漢岱伊爾德阿濟格尼堪杜爾德

等先驅趨揚州獲船百餘距揚州城二十里列營
復遣署護軍統領固納岱伊爾都齊費揚古烏達
禪副都統阿哈尼堪署副都統格霸庫等軍城南
護船二百餘翼日薄城下招諭明大學士史可法
翰林學士衛允文等降不從遣拜音圖圖賴阿山
等攻之七日克其城可法等死焉五月師至揚子
江明鎮海伯鄭鴻逵等以水師分守瓜州儀徵我
軍陳北岸列營相持三日會日暮遣拜音圖圖賴

阿山等率舟師由運河潛渡其夜五鼓復令副都統李率
泰率舟師渡江留左翼兵泊北岸以備夾擊福王聞揚州
失守率馬士英及諸太監遁太平大軍至南京
明忻城伯趙之龍魏國公徐州爵保國公朱國弼隆平
侯張拱日臨淮侯李祖述懷寧侯孫維城靈璧侯
湯國祚安遠侯柳祚昌永康侯徐宏爵定遠侯鄧
文圓項城伯常應俊大興伯鄒順益寧晉伯劉允
基南和伯方一元東寧伯焦夢熊安城伯張國才

洛中伯黃周鼎成安伯柯祚永駙馬齊贊元大學
士王鐸翰林程正揆張居禮部尚書錢謙益兵部
侍郎朱之臣梁雲構李綽給事中林有本陸朗王
之晉徐方來莊則敬及都督十六員巡捕提督一
員副將五十五員迎降其沿途來歸者興平伯高
傑子高元照庸昌伯劉良佐提督李本深總兵胡茂
正張士元郭護楊承祖李中星何應昌翟鳴鳳王
之剛李遇春張天祿張天福李成棟李棲鳳等二

十三人監軍道張健柯起鳳副將四十七人叅將
遊擊共八十六人馬步兵二十三萬八千三百捷

聞

諭曰

皇天眷佑

宗廟式靈王公將士分猷宣力方平河朔旋定江南覽王
奏報朕深嘉悅王躬履戎行指授方畧克奏膚功特遣
侍臣前赴軍中慰勞一應有功將帥官兵作速察叙以

憑封賞時王入駐城中安撫居民令投誠軍士歸伍遣
貝勒尼堪貝子屯齊等追福王于太平福王復走
蕪湖登舟欲渡江圖賴等邀之江口明靖國公黃
得功迎戰敗之敵兵皆墮水盡奪其舟得功中流
矢死總兵田雄馬得功縛福王及其妃歸我軍初
福王走太平其大學士馬士英挾福王母走杭州
議奉潞王朱常淂拒守六月貝勒博洛等趨杭州
士英迎戰大敗夜渡錢塘江逃潞王率衆降浙東

西皆歸順明淮王朱常清亦自紹興來降王承

制改南京為江南省疏授江寧安慶巡撫以下官三百七

十三人復遣人至湖州移周王眷屬於杭州安置

收總兵王之仁屬下兵將二萬五千人有偽稱杜

楊王煽亂廬州和州間者遣總兵吳勝兆等勦平

之七月

詔多羅貝勒勒克德渾為平南大將軍至江寧

命王等俘福王還京十月凱旋

上行郊勞禮于南苑晉封和碩德豫親王

賜黑狐帽紫貂朝服黃金五千白金五萬馬十玲瓏鞍二
三年五月以蘇尼特部騰機思騰機特等叛奔喀
爾喀

詔集外藩諸蒙古兵於克魯倫河以多鐸為揚威大將軍
同承澤郡王碩塞等統師追勦七月師至盈阿爾
察克山聞騰機思在衮噶魯台星夜前進三日及
之敗賊于諤特克山斬台吉茂海渡圖拉河追至

布爾哈圖山斬騰機特子二人孫三人及喀爾喀
台吉十三人盡獲其家口輜重師次扎濟布喇克
喀爾喀土謝圖汗兩子以兵二萬碩雷汗子以兵
三萬兩路迎戰我師奮擊大捷追奔三十餘里先
後斬級數千俘千餘人獲駝千九百馬二萬一千
一百牛萬六千九百羊十三萬五千三百有奇十

月凱旋

上出安定門迎勞錫宴所獲牲畜

詔頒賚將士加

賜王鞍馬一四年七月晉封輔政叔德豫親王

賜黃金千兩白金萬兩鞍馬二

冊文稱其定鼎中原以來所建功勲卓越等倫云六年三

月薨年三十六以其子多尼襲七年三月立碑紀

功九年鄭親王濟爾哈朗等會議豫王係多爾袞

母弟應盡削王爵

上念其功止追降為郡王康熙十年五月追謚曰通乾隆

四十三年正月

上諭廷臣曰豫親王多鐸從睿親王入闕肅清京輦即率師西平流寇南定江浙實為開國諸王戰功之最乃以睿親王之誣獄株連降其親王之爵其後又改封信郡王雖至今承襲罔替但以王之勲績超邁等倫自應世昨原封以彰殊眷豈可以風影微眚輒加貶易

命追封親王復其封號並配享

太廟八月入祀

盛京賢王祠

多羅信郡王多尼

子鄂北多尼弟洞鄂

多尼豫通親王多鐸次子崇德七年七月封多羅
郡王順治六年十月襲父和碩親王爵七年五月
預議政八年二月加封號曰信九年三月追降多
鐸為郡王多尼亦降多羅信郡王罷議政十月復
議政十五年正月

上命多尼為安遠靖寇大將軍偕平郡王羅科鐸貝勒

尚善杜蘭等证明桂王朱由榔與征西大將軍平西
王吳三桂征南將軍都統卓布泰會於平越府之
楊老堡定議分兵進取王自貴陽入吳三桂自遵
義入卓布泰自都勻入約以十二月會雲南省城
十一月王由貴陽趨安莊衛由榔將晉王李定國
焚磨盤江鐵索橋遁十二月我兵以浮橋濟遂自
交水至松嶺衛鞏昌王白文選率兵二萬拒我軍
擊走之十六年正月薄雲南省城時吳三桂卓布

泰亦至定國文選挾由榔奔永昌王入城駐守遣貝勒尚善等由鎮南州克永昌府及騰越州六月

上以王跋涉險阻經歷寒暑傳

諭慰勞

賜御用衣一蟒袍一及鞍馬弓矢等物十七年五月凱旋遣內大臣迎勞十八年正月薨年二十六諡曰宣和六月以其子鄂扎襲封多羅信郡王康熙十四年三月察哈爾布爾尼叛

上命鄂扎為撫遠大將軍往討以大學士都統圖海副之
護軍統領哈克山副都統吳丹洪世祿為叅贊瀕

行

諭之曰大兵出山海關當宣布累朝待布爾尼厚恩及朕
不忍加誅之意彼若悔罪來歸則已否則以勅書付縱
還蒙古持往諭之即布爾尼等臨陣來降亦當保全恩
養今值蒙古馬瘦爾等速往毋違四月師次岐爾哈台
偵賊屯達祿王留輜重以輕騎進布爾尼設伏山

谷間列陣而待王與圖海等分布滿洲蒙古兵進
擊厯山澗賊伏發撓我土默特兵我軍擊破之布
爾尼領大隊列火器以拒我兵奮擊賊大敗復收
潰卒戰我軍乘勝連敗之布爾尼偕其弟羅卜藏
以三十騎遁至扎魯特境貴勒蘇台為科爾沁赴
調之部長沙津射殪察哈爾平王招撫餘黨編為一
千三百餘戶閏五月師還

上迎勞于南苑

諭嘉其遠行征討建立大功

賜黃金百兩白金千兩二十四年掌宗人府事二十九年

噶爾丹深入烏珠穆沁

上命恭親王常寧為安北大將軍鄂扎副之三十五年二月

上親征噶爾丹以王統領正白旗營三十八年以愴解宗人府任四十一年十月薨以其叔洞鄂襲多羅信郡王洞鄂豫郡王多鐸第七子順治十八年正月封

多羅貝勒康熙十二年冬逆藩吳三桂反於雲南
四川文武官叛應之十三年六月洞鄂奉

命為定西將軍同貝子溫齊輔國公綽克托率貝子準
達所領驍騎之半由陝西進討將抵略陽陝西提
督王輔臣叛于寧羗州洞鄂以道阻退次漢中留
將軍錫卜臣等駐守自引兵出棧道由鳳縣至鳳
翔復留副都統赫業等駐守自率餘兵回西安十
四年正月

上諭廷臣曰蘭州近邊要地應速遣兵駐守今保寧大兵已回西安達禮善巴圖魯兵亦將至西安其餘西安現在兵每佐領下四五名赴蘭州勦禦逸賊洞鄂疏言蘭州固宜遣防但保寧還卒鎧甲未備達禮善巴圖魯兵兼程來恐難驟遣若以西安兵往恐輔臣由陳倉諸路斷我棧道自秦州平涼來逼深為可虞又疏言興安兵變殺總兵王懷忠臣等出示安撫仍止前往興安之副都統穆舒渾兵

上勅撫慰興安又

諭洞鄂曰陝西重地棧道關係尤急沔州秦州乃通漢中
要路其若何據守保固與總督等會議務期萬全時鳳
縣賊毀偏橋守隘阻運輔臣所部王好文等復斷
棧道二月

諭責洞鄂等退縮遲延致狡寇阻截仍

嚴飭往定平涼秦州諸路於是將軍阿密達署副都統鄂
克濟哈等率所調興京兵西安兵往平涼洞鄂與溫

齊綽克托等率回自保寧及達禮善巴圖魯兵往秦州是月賊陷蘭州

勅兩路兵速進洞鄂至隴州經仙逸關偽總兵高鼎等聚衆四千據關山河岸立營拒守洞鄂與署前鋒統領穆占西安將軍佛尼勒副都統達禮善巴圖魯分布八旗官兵令驍騎兵俱步行為前隊前鋒及護軍兵為後隊又預撥都統赫業為奇兵就近應援比接戰自己至午賊力拒赫業已援兵合力衝

擊賊敗遁斬殺甚多因乘勝追擊復闢山關三月
大軍次渭河奪其橋圍秦州四月王輔臣遣賊
兵萬餘自平涼來援屯南山城內賊兵八千餘突
出我兵分擊大敗之克東西兩關屢敗賊陣斬偽
總兵何隆李國棟招撫偽文武官二百二十餘兵
八千四百餘安輯民人九萬有奇遂復秦州又遣
振武將軍佛尼勒內大臣坤巴圖魯總兵官孫思
克追勦至閻關賊迎戰破之復禮縣追賊至西和

殺千餘人陣斬偽官三十清水伏羗俱平捷

聞得

旨嘉獎又遣西安將軍穆占率兵援鞏昌復郡城七月

上諭洞鄂曰國家仰荷

天眷秦州鞏昌蘭州等處漸次恢復朕甚嘉悅此係保寧
還旆之兵間關跋涉努力効命所致湏不時存念恤其
勞苦非緊要必節其勞無大過則寬其罰爾等將兵在
外事情經練頗多必能同寅協恭折衷而行但相隔遼

遠慮所及不得不為告誡秦地實為形勝要區今將軍總督總兵及投誠兵衆雲屯一處將軍張勇勞績甚多恐貝勒等藐忽視之生彼憤懣時屢朕懷貝勒等既效勤勞底定秦省務期克奏全功以慰朕望八月偽總兵趙士昇以蘭州降歸川十二保及偽叅將普國祥兵千餘人皆就撫遂與平逆將軍畢力克圖揚威將軍阿密達會于平涼賊出城迎戰我軍合擊屢敗之斬偽總兵郝天祥餘擒斬無算九月遣副都

統鄂泰阿爾琥敗賊于寶雞縣羊添池山焚其營
十二月疏言大兵攻平涼克取第一關廂距城三
里許對南山屯營欲進薄城因溝深地險難下壘
故未能即下

諭宜斷餉道以困之十五年二月

諭兵部曰大將軍貝勒洞鄂等屯兵平涼日久賊寇尚未
剿滅城池尚未恢復夫秦省不能即定川賊尚在窺伺
者皆由王輔臣未剿滅平涼未克取故也其以都統大

學士圖海為撫遠大將軍率每佐領護軍二名並赴陝西總轄全省滿漢大兵斷賊餉道剿滅逆孽速靖地方大將軍抵平涼時盡收各將軍敕印遇有分遣酌量給付其貝勒洞鄂以下悉聽大將軍節制是月疏言聞逆賊將斷關山擬遣兵往守現在兵少難分至鞏昌雖有副都統翁愛率兵前赴而賊逼可虞

命將軍錫卜臣等調兵守關山張勇等堵剿出犯秦鞏之賊十六年二月部議陝西軍前功罪以洞鄂在軍

前無功革貝勒爵三十一年九月任正藍旗滿洲
都統四十二年三月兄子信郡王鄂扎薨以洞鄂
襲多羅信郡王爵四十五年六月薨王薨後禮部
請卹

上諭廷臣曰洞鄂補授都統襲王爵以來並無戴恩効力
之處且係軍政問罪之人不准賜卹其王爵亦當論嫡
長所生以信郡王鄂扎之子德昭襲德昭既襲封多羅
信郡王雍正二年十一月授宗人府左宗正四年

八月管正白旗事務五年十一月轉左宗正乾隆
二十七年二月薨年六十有三謚曰愍以豫通親
王多鐸六世孫如松襲初多鐸第三子多爾博出
為睿親王後睿親王被罪未及襲還本宗封多羅
貝勒多爾博生蘇爾發襲固山貝子生塞勒塞勒
生功宜布皆襲輔國公如松功宜布第三子也乾
隆十一年六月襲父爵輔國公十七年七月任

乾清門散秩大臣二十一年四月管健銳營事六月

署鑲黃旗滿洲副都統二十二年正月署領侍衛
內大臣尋授宗人府右宗人二月授兵部侍郎四
月授鑲紅旗滿洲副都統二十三年二月調正黃
旗滿洲副都統九月遷正黃旗漢軍都統二十四
年六月轉左宗人九月署兵部尚書十二月授領
侍衛內大臣二十五年十月授綏遠城將軍二十
六年十一月調西安將軍二十七年閏五月

命襲封多羅信郡王八月授正藍旗蒙古都統九月署領

侍衛內大臣二十八年七月授右宗正十月管理
宗人府銀庫事三十年十一月以縱興夫開博場
應革爵得

旨寬免在閒散王上行走如松請歲繳王俸五千兩贖罪
宗人府議不足蔽辜應革爵

命照如松請仍免革爵三十五年十一月薨年三十有四
謚曰恪三十六年以懋郡王德昭第十五子修齡
襲修齡初于乾隆二十七年六月襲如松所遺之

輔國公三十年十二月授散秩大臣三十四年十月授宗人府右宗人十二月任正白旗滿洲副都統三十五年正月調鑲紅旗滿洲副都統五月轉左宗人閏五月調正紅旗漢軍副都統三十六年四月

命襲封多羅信郡王旋授左宗正三十七年三月總理鑲白旗覺羅學四十三年正月

特命復豫通親王始封爵號晉襲和碩豫親王四月任

正白旗蒙古都統四十八年十月授盟長十一月
掌宗人府事四十九年閏三月調鑲藍旗滿洲都
統五十一年三月薨年三十有八謚曰良十月以
其長子豫豐襲封和碩豫親王

原封多羅貝勒察尼

察尼豫通親王多鐸第四子順治十三年正月封
多羅貝勒康熙七年正月授宗人府左宗正七月
預議政九年三月充

王牒館副總裁十二年十二月逆藩吳三桂反

命寧南靖寇大將軍順承郡王勒爾錦由湖廣進剿以察
尼叅贊軍務十三年三月至荊州時賊已陷岳州
七月察尼與鎮南將軍尼雅翰水陸齊進偽將軍
吳應麒以賊七萬餘由陸路來拒察尼等督兵奮
擊大敗之斬首萬級舟師抵七里山以礮攻沉賊
船十餘六月

命貝勒尚善為安遠靖寇大將軍赴岳州察尼回荊州駐

守十四年五月賊陷穀城察尼佩靖寇將軍印往
援都統伊里布等先至賊棄城遁時賊陷南漳興
山又增兵犯彝陵據城外鎮荆山掘壕結寨八月
察尼至彝陵以賊寨難進攻其糧由江運議增舟
師斷賊運道困之十月遣兵敗賊牛皮了口進攻
黃連坪焚其積聚興山賊遁十五年二月吳逆
移南漳彝陵賊兵向長沙順承郡王令察尼回荆州
渡江剿賊同都統伊里布等趨石首賊據虎渡口

迎戰敗之追至太平街斬級三百餘泊江南岸翼日再登岸擊賊過太平街遇賊伏失利退荊州

詔責勒爾錦老師糜餉察尼叅贊無能令立功贖罪十七年八月貝勒尚善薨於岳州軍中

上命察尼代為安遠靖寇大將軍規復岳州九月疏言舟師入湖已久雖未大挫賊鋒賊亦不能出戰近聞賊餉將絕將軍林興珠獻策謂宜于湖水涸後圍以木柵立木椿列火礮俾小船巡警以困之然湖

水之涸為期尚遲雨三月間賊中安知無變今乘
水勢未退立一營於南津港俟水涸酌撥舟師營
於君山高家廟絕其糧道賊勢窮蹙不難撲滅

上善其言令副都統關保率兵赴岳州軍聽調遣是月遣
提督桑額攝撫遠將軍彰泰率師至南津港大敗
賊衆十一月偽將軍杜輝巴養元姜義等賊舟
犯陸石口將軍鄂納敗之斬千餘級遣署副都統
葉儲赫進攻岳州破賊萬餘時賊糧已匱屢乘舟

出意在疏通餉道每出鏖戰移時偽帥率衆五千
自高家廟渡江來犯我營察尼遣署前鋒統領杭
奇助禦却之先是察尼以舟師屢出戰疏請發江
南子母等礮一千又請調荊州水師總兵張忠并
標兵營君山高家廟

上皆允之至是又疏言湖水漸涸陸地漸出我兵營伍隔
絕恐賊潛通糧饋請增發滿漢兵議政王大臣議
不允

上以圍取岳州關係緊要賊糧將絕宜益兵遂

命安親王岳樂量調長沙閒駐兵赴岳州十八年正月疏
請調兵六千圍岳州城並請設隨征左右前後四
營總兵官分轄

詔如所請是月偽總兵王度冲偽將軍陳珀等各以其舟
師降吳應麒等棄城遁復岳州計招撫偽官六百
餘兵五千餘獲船六十五礮六百四十餘二月安
親王自長沙進取衡州察尼發綠旗兵沙船助其

軍尋遣都統珠滿追擊賊于湘陰斬獲無算復其城提督桑額克安鄉降偽官三員四月

命察尼由常德進征辰龍關軍務在澧州以南者聽調度
十九年三月同都統鄂訥等攻克辰龍關抵辰州
賊潰遁偽知府傅祖祿以成降並招撫偽將軍楊
有祿周楨楊寶蔭祖述舜等五月疏言自常德進
辰沅沿途雨澤馬乏

詔暫屯沅州酌量進發六月疏言在軍前鋒四百有奇護

軍驍騎每佐領二十餘人應簡前鋒三百每佐領護軍六驍騎九進取雲貴

上命彰泰統師進征察尼領久征勞苦之滿洲兵還京十一月議察尼出師湖廣不速扼要害退縮不前老師糜餉坐失事機幾至悞國應削貝勒及議政宗人府職籍家屬財產仍拘禁得

旨察尼應如議處分但既克岳州且從前有効力之請著從寬免其羈禁籍沒僅削爵為閑散宗室二十四年十

二月

特授奉天將軍二十七年九月卒年四十有八喪還
遣領侍衛內大臣公費揚古往奠

賜祭葬如輔國公例謚曰恪僖爵除

欽定八旗通志卷一百二十六

欽定四庫全書

史部

欽定八旗通志卷

一百二十七至
一百二十九

欽定四庫全書

欽定八旗通志卷一百二十七

人物志七

宗室王公傳五

和碩肅武親王豪格

和碩肅武親王豪格

豪格

太宗文皇帝長子初從征蒙古棟夔察哈爾鄂爾多斯諸

部屢立軍功封貝勒天命十一年十月奉

命同大貝勒代善等率精兵萬人往征蒙古喀爾喀札嚕
特部落所向皆捷斬其貝勒鄂爾齋圖擒巴克父
子三人及拉什希布岱青多爾濟桑阿爾齋等十
四貝勒以俘獲還天聰元年五月

上親征明至廣寧舊邊分兵三隊豪格同貝勒德格類等
敗明兵於錦州復率偏師衛塔山糧運豪格以精
騎八十人先行遇明兵二萬擊却之二年同貝勒
濟爾哈朗征蒙古固特塔布囊誅之收其衆三年

九月復從

上征明

命同三貝勒莽古爾泰等赴通州視渡口捕哨卒大兵由
通州薄京師明寧遠巡撫袁崇煥錦州總兵祖大
壽等以兵二萬來援屯廣渠門外右偏伏重兵莽
古爾泰令諸貝勒擊其右避敵者罪之豪格直趨
右偏敗其伏衝殺至城壕敵大潰十二月同貝勒
岳託薩哈璘率兵四千圍永平府攻克香河縣四

年正月奉

命同岳託往瀋陽代留守兵五年七月

上率諸貝勒將帥及大軍攻明大凌河城豪格奉

命與貝勒杜度薩哈璘等居守都城六年五月從

上征察哈爾林丹汗遁移師略歸化城六月晉封和碩貝

勒七年六月

詔問征明與察哈爾朝鮮孰先豪格奏言錦州寧遠攻之

無益蓋我國攻城之法彼盡知之況我兵先曾攻

之而未得若復令攻之必有畏難之意雖得錦州
此外七城尚煩攻取若徒得一城其餘亦未必歸
服當思不勞而得之法今盡率我兵及邊外新舊
蒙古兵從舊道入焚畧各處為書頒各屯寨告以
我願和而彼不肯和之意則彼處人民必自怨其
主於我無尤我軍馬匹或斃即以所獲貲財買補
餘用製衣則嗣後進兵人人願往誰肯安坐如此
去而速返俟秣馬肥壯稍益以漢軍携紅衣礮分

兵兩路一從寧遠入一從舊路入夾攻山海關得之則已不得則屯兵彼地遣人往招流賊不然進攻通州久駐其地如流賊仍在則遣師乘夜襲之至朝鮮宜暫撫慰俟我勝負既定再議察哈爾若離興安嶺二三日程雖追無及若近可相機行也

八月

命與阿巴泰貝勒等率額駙楊古利統兵二千略明山海關俘獲戶口牲畜四千有奇八年七月

上將由尚方保入明邊攻宣府朔州一帶

命豪格率額駙楊古利等先往拆毀邊牆大兵遂入尚方

保分道進閏八月

命同貝勒多爾袞略朔州及五臺山還從

視大同攻其城明兵來援擊敗之追及城壕還獲馬百九

年二月

命與多爾袞岳託薩哈璘統兵萬往收察哈爾林丹汗之

子額哲四月大兵至錫喇珠爾格察哈爾汗妻及

台吉索諾木率所屬千五百戶降仍率兵前進造船渡黃河抵托里圖天霧晦額哲無備豪格與諸貝勒等恐其驚潰按兵不動遣葉赫貝勒錦台什之弟南楚及其族叔祖阿什達爾漢併哈爾松阿代袞先往宣

諭慰撫額哲遂奉其母率衆宰桑台吉出迎降時鄂爾多斯部濟農誘額哲往附與之盟且行矣我前軍阿什達爾漢等追濟農還

諭令盡返所携察哈爾人戶遺物不然即移兵往討濟農
懼盡送於軍遂携降民渡黃河至歸化城時岳託
以疾留駐豪格同諸貝勒率額哲等略明山西自
平魯衛入遇明右衛兵二百敗之進至朔州有寧
武關叅將以兵來拒殺十餘人叅將被創遁我兵
直抵長城下遣前鋒統領勞薩毀關入略代州忻
州至忻口明總督遣兵七百來偵我軍左翼兵擊
走之追至崞縣乃還出長城自應州赴平魯衛明

兵五百出城陣我右翼兵破之追至城壕斬級百餘遂率大兵出邊計俘獲人畜七萬六千二百至歸化城與岳託會班師事互詳睿忠親王傳崇德元年四月晉封和碩肅親王兼理戶部事尋以黨岳託且漏

上言有怨心降貝勒解部任罰鍰八月同睿親王多爾袞攻明錦州降胡有陞等十一月仍

命攝戶部事務十二月

上親征朝鮮豪格與睿親王分統滿洲蒙古及外藩蒙古
各左翼兵別從寬甸路入二年正月入長山口昌
州軍民棄城奔山寨克之又敗安州黃州援兵寧
邊守將以兵千來戰豪格遣蒙古都統蘇納等敗
之擒其帥師至宣屯村村民言黃州總兵聞其王
被圍率兵萬五千往援行三日矣豪格選兵夜疾
馳旦至陶山襲擊敗之九月以都統鄂莫克圖欲
脅取蒙古台吉博洛女以媚豪格豪格不治其罪

議罷部任罰鍰三年十月復同睿親王等征明自
董家口毀邊牆入敗明兵於豐潤縣遂下山東降
高唐州略地至曹州明兵毀橋拒我師列陣誘敵
潛渡遶其後敗之還下東光縣又遣騎二千敗郭
太監兵於滹沱河破獻縣四年四月凱旋獻所獲
於

篤恭殿

上酌納之

賜豪格馬二銀萬兩八月仍

命管戶部事九月復封肅親王十一月偕貝勒多鐸征錦

州明寧遠兵出北山岡來拒遣右翼兵擊敗之陣

斬總兵金國鳳及其二子五年六月同睿親王等

屯田義州刈其禾稼屢敗明兵克其臺卻其總督

洪承疇援兵十二月同睿親王多爾袞圍錦州以

我軍離城遠駐又遣弁兵私回罪與睿親王並降

郡王六年六月

命同睿郡王多爾袞往代鄭親王濟爾哈朗等圍錦州屢
擊松山及山海關援兵有斬獲明總督洪承疇以
兵十三萬來援我兵敗其三營獲馬五百餘以敵
兵多請濟師

上遂統大兵親征自盛京疾馳六日至戚家保

遣內國史院大學士剛林等

諭多爾袞豪格等駐營高橋俟大兵至合圍松山杏山豪
格與多爾袞等奏請

上駐營松山杏山間

上允之明兵屢犯我營汎皆敗見大兵環松山而營大懼

明總兵吳三桂等沿海夜奔寧遠九月

命與睿郡王多爾袞等還守

盛京十一月同輔國公滿達海等圍明松山敗敵兵

七年二月明松山副將夏承德密約內應以其子

夏舒為質遂於城南豎梯夜登生擒承疇及巡撫

邱民仰總兵王廷臣曹變蛟祖大樂總兵白廣恩

之子白良弼等斬兵備道副將遊擊都司守備等
官百餘人兵三千有奇俘獲人口器械無算事詳
豫通親王傳三月駐松山斬明兵出樵採者三十
餘人又遣前鋒努山擊敗明兵之欲入寧遠者五
百餘人四月復同鄭親王濟爾哈朗睿郡王多爾
袞攻塔山以巨礮轟擊之城陷二十餘丈我兵由
陷處先登克其城殲其官兵七十七月叙功復封
肅親王

賜鞍馬一蟒緞百順治元年四月以語侵睿親王為都統
和洛輝所訐削爵十月復封肅親王是年冬

命勦山東土寇至則定濟寧破滿家洞等賊巢堙二百五
十一洞土寇平三年正月奉

命為靖遠大將軍率同衍禧郡王羅洛渾貝勒尼堪等征
四川流寇三月抵西安遣尚書星訥等勦賊於邠
州降宋大傑賀洪器齊勲張國棟等復遣都統都
類勦賊於慶陽五月賊渠劉文炳康千總郭天星

等迎拒擊之斬千總時賊渠賀珍二隻虎孫守法
據漢中興安武大定高如礪蔣登雷石國璽王可
成周克德據徽縣階州大軍自西安進分兵奮擊
降登雷國璽可成克德餘潰遁復所陷州縣陝西
平十一月入蜀至南部偵賊張獻忠列營西充縣
境令護軍統領鰲拜等分領八旗兵先發親統大
軍星夜繼進詰旦抵西充獻忠悉衆拒戰我兵奮
擊大破之斬獻忠於陣復分兵四出破賊營一百

三十餘斬數萬級獲馬羸一萬二千二百有奇捷

聞

諭曰王等指授方畧克奏膚功獻忠伏誅四川平定深可
嘉悅有功官兵察明議叙四年分兵征勦遵義夔州茂
州榮昌隆昌富順內江資陽等處斬偽王及巡撫
總兵副將以下官千餘人兵丁無算獲馬羸萬二
千四百餘川寇平五年正月凱還

遣內大臣達爾漢諾延往迎二月至京

上御太和殿宴勞之三月睿親王以豪格徇隱隨征護軍
叅領希爾根冒功事又欲擢用罪人揚善之弟吉
賽議罪削爵繫獄尋卒八年

上親政念其枉復和碩肅親王爵立碑表之以其子富綬
襲十三年九月追謚曰武再立碑紀功乾隆四十
三年正月

上追念肅親王忠勛

命配享

太廟其現襲之顯親王復封號曰肅八月

命入祀

盛京賢王祠豪格第四子富綬於順治八年二月襲封和碩親王改號曰顯尋預議政康熙八年十二月薨謚曰懿九年六月以富綬第四子丹臻襲封和碩顯親王三十五年二月從

上征噶爾丹同副都統禪穆布統領正藍旗營四十一年五月薨謚曰密丹臻第六子衍璜襲乾隆元年二

月總理鑲白旗覺羅學三十六年十二月薨謚曰
謹三十七年以富綬孫輔國將軍拜察禮之子蘊
著襲蘊著初於康熙四十七年封三等奉國將軍
乾隆七年六月授內閣侍讀學士十年二月遷通
政使十一月遷

盛京戶部侍郎十二年五月調兵部侍郎尋任鑲黃
旗滿洲副都統九月授漕運總督十四年四月以
受商人程志仁等餽遺又稱奉

旨嚴查鹽政吉慶私產狡詐乖張擬絞監候嗣

恩釋二十年授鑲白旗漢軍副都統二十一年調右衛副
都統二十三年授涼州將軍二十七年調綏遠城
將軍二十八年攝歸化城都統事三十年授工部
部尚書三十一年正月預議政尋充

經筵講官二月管會同四譯館三十二年因工部派
辦溝渠工程不公降二級調用三十七年襲封和
碩顯親王五月授鑲藍旗滿洲都統三十八年總

理鑲藍旗覺羅學四十三年正月

命復肅武親王始封之號仍為肅親王是年四月薨謚

曰勤以丹臻孫奉國將軍成信之子永錫襲永錫

初於乾隆三十三年授三等侍衛四十三年襲封

和碩肅親王四十九年六月總理正黃旗覺羅學

欽定八旗通志卷一百二十七

欽定四庫全書

欽定八旗通志卷一百二十八

人物志八

宗室王公傳六

和碩承澤裕親王碩塞 和碩敬謹莊親王尼堪

和碩承澤裕親王碩塞

嗣孫允祿

碩塞

太宗文皇帝第五子順治元年十月封多羅承澤郡王時
流賊李自成奔潼關河南仍為賊守十二月隨定

國大將軍豫親王多鐸南征破流賊平陝西安撫
河南事詳豫親王傳二年二月還師河南尋隨豫
親王征明福王朱由崧於江南四月

恩賜王團龍紗衣一襲五月渡江克江寧福王就俘十月
凱旋

賜黃金二千白金二萬玲瓏鞍馬一三年五月蘇尼特部
騰機思騰機特等叛奔喀爾喀

諭集外藩諸蒙古兵於克魯倫河以和碩德豫親王多鐸

為揚威大將軍往勦

命王隨行叅贊軍務有功七月敗喀爾喀土謝圖汗碩雷汗兵
五年八月同英親王阿濟格等奉

命勦天津土寇殲之十一月喀爾喀行獵近邊復同英親
王駐防大同至則總兵姜瓖已據城叛王堅守汛
地賊至掩擊之六年正月賊黨劉遷攻代州王率
兵往援入其郭破之賊復於助馬得勝兩路結營
以拒王親督戰敗之六年三月睿親王赴大同承

制晉封碩塞為親王七年八月以和碩親王下多羅郡王
上無止稱親王者仍改多羅郡王八年閏二月晉
封和碩承澤親王三月

命管兵部事十月預議政十一年十一月掌宗人府事十
二月薨年二十有七康熙十年六月追諡曰裕碩
塞長子博果鐸於順治十二年襲封和碩親王改
封號曰莊雍正元年正月薨年七十有四諡曰靖
無嗣二月

命以

聖祖仁皇帝第十六子允祿為博果鐸後襲封和碩莊親王二年十月掌宗人府事七年二月任正紅旗漢軍都統十年八月調正黃旗滿洲都統

令上御極

命總理事務兼掌工部食親王雙俸王承

聖祖仁皇帝指授精天文算法預修數理精蘊至是克增

修七政時憲書總裁又修律呂正義後編

御製序稱其貫徹樂義乾隆二年十二月以總理事務
得優叙

賜一奉恩鎮國公並

允王請以承澤裕親王曾孫寧赫襲三年二月任理藩
院尚書尋充

玉牒館總裁四年十月議王與弘哲往來黨私應削爵得
旨寬免裁親王雙俸罷理藩院尚書任十二月復以王
私抵官物應削爵

詔仍免罰親王俸五年六年十二月

特旨免罰俸七年六月總理樂部事二十九年六月王

七十誕辰

賜詩有近尊行裏無雙老闔藩衛中有數賢之句三十

二年二月薨年七十有三謚曰恪以其孫永瑞襲

永瑞奉恩輔國公弘普長子初於乾隆八年襲父

爵奉恩輔國公二十一年管健銳營事二十二年

正月署鑾儀衛事七月任鑲黃旗滿洲副都統三

十二年六月襲封和碩莊親王尋任鑲紅旗蒙古都統十月總理樂部事三十四年總理正藍旗覺羅學三十八年九月署領侍衛內大臣十月授盟長十一月掌宗人府事三十九年總理左右翼宗學四十一年充

玉牒館總裁四十二年調正紅旗滿洲都統五十三年二月薨謚曰慎以永瑞弟奉國將軍永珂之長子綿課襲封和碩莊親王

和碩敬謹莊親王尼堪

尼堪原封廣畧貝勒褚英第三子褚英為

太祖高皇帝長子歲戊戌正月與台吉巴雅喇等領兵一
千征安楚拉庫路夜馳往取屯寨二十餘降萬餘
人

賜號洪巴圖魯尋封多羅貝勒丁未年春正月東海瓦爾
喀部蜚悠城長策穆特赫苦烏拉國布占泰之虐
乞移家來附褚英奉

命同貝勒舒爾哈齊代善率兵三千徙之乘夜行陰晦見
大燾上有光衆以為異捫視無有復樹之光如初
舒爾哈齊貝勒疑非吉兆欲回兵褚英與代善持
不可曰吉兆已定吾等何所見而回兵決意進
至蜚悠城盡收其屯寨五百戶令侍衛扈爾漢率
兵三百衛之先行布占泰聞之以萬人邀諸路扈
爾漢倚山陣與敵相持次日褚英與代善等至策
馬奮怒曰

皇父每有征伐無不破降其衆今雖未親歷行間有我等
來此爾衆無憂昔擒布占泰賓歸俾主其地未幾
背恩如故今豈不能再縛之衆皆曰願効力褚英
遂與代善各率兵五百夾擊大敗之斬其帥生擒
貝勒常住瑚里布及常住之子死者相枕藉獲馬
五千甲三千

上嘉獎之更

賜號廣畧貝勒戊申三月同貝勒阿敏征烏拉宜罕山城

克之布占泰與蒙古科爾沁貝勒翁阿岱合兵出
烏拉城二十里遙望我軍知不可敵相約還復以
失宜罕山城大懼遣使來盟乙卯閏八月褚英以
罪伏誅爵除尼堪初隨征多羅特董夔諸部有功
天聰九年五月大兵征明山西隨多鐸率偏師入
寧錦界以牽制明兵俾毋西援崇德元年封固山
貝子十二月

上征朝鮮李倬遁尼堪隨豫親王多鐸追至南漢山城圍

之朝鮮將領兵萬八千來援我兵迎敵大敗之又
擊敗其副將援兵五千二年正月倭降師還四月
任議政大臣四年三月

上征明尼堪同武英郡王阿濟格貝子洛託等率四旗護
軍兵環守塔山連山七年九月尼堪代公博和託
屯濟哈等駐錦州順治元年四月隨睿親王多爾
袞入山海關破流賊復隨武英郡王阿濟格追至
望都十月晉封多羅貝勒隨定國大將軍豫親王

多鐸南征十二月自孟津至陝州大破賊衆二年
正月抵潼關賊將劉方亮領兵犯我營尼堪與護
軍統領圖賴夾擊敗之獲馬三百餘賊又以騎兵
橫衝我師復同懷順王耿仲明固山貝子尚善擊
敗之遂破潼關三月分兵趨歸德定河南三月進
征江南

諭嘉王貝勒等破流寇平陝西安撫河南勤勞日久

賜尼堪弓一五月大兵克南京明福王朱由崧遁太平復

走蕪湖尼堪同圖賴等率兵追及之福王將靖國
公黃得功逆戰擊敗之奪其舟得功中流矢死田
雄等縛獻福王餘衆俱降又以礮攻克江陰縣十
月凱旋

賜金二百銀萬五千鞍一馬三三年正月隨肅親王豪格
統兵西征尼堪抵西安由棧道進賊渠賀珍自鷄
頭關迎拒敗之抵漢中疾躡其營賊潰走西鄉追
擊於楚湖至漢陰賊二隻虎奔四川孫守法奔岳

科寨十一月入蜀張獻忠伏誅與貝子滿達海等
分兵進勦遵義夔州茂州榮昌隆昌富順內江資
陽等處斬偽王及官弁等二千三百有奇俘獲無
算川寇平互見武肅親王傳五年正月凱旋九月
晉封多羅敬謹郡王與英親王阿濟格勦平天津
土寇六年正月

命為定西大將軍討大同叛鎮姜瓖三月都統阿賴等屢
挫賊衆敗偽巡撫姜輝兵偽叅將羅英壇率所部

降是月睿親王多爾袞赴大同招撫承

制晉尼堪為親王四月圍大同八月偽總兵楊振威斬瓊
及其兄琳弟有光來降師還七年二月

命與滿達海博洛等同理六部事八月以徇隱尚書阿哈
尼堪不親往迎朝鮮王弟事降郡王八年正月復
晉封和碩敬謹親王二月同諸王奏削故睿親王
封爵三月以英親王私藏兵器事隱不奏降郡王
尋

命諸王分管六部事王掌禮部五月復封親王九年六月
掌宗人府事時獻忠餘孽孫可望李定國等皆受
明桂王朱由榔封爵分犯湖南貴州七月
命王為定遠大將軍往征之瀕行

賜御衣佩刀鞍馬

上親送至南苑八月定國陷桂林

勅王母往貴州取湖南寶慶後入廣西勦賊十一月師抵
湘潭由榔將馬進忠等遁還寶慶我師進擊於衡

山敗其兵千八百是夜兼程過衡州詰旦大兵方
列陣定國兵四萬餘猝至王遣首隊進擊各依所
向衝入賊大敗遂北二十餘里獲象四馬四百有
奇方首隊兵進擊時林內賊伏發又衡州城內賊
出應之師欲退王曰我兵凡臨戰陣無退者我為
宗室若不斬除逆寇何面目歸乎遂奮勇直入賊
環圍之王身率諸將士縱橫衝擊矢盡拔刀力戰
歿于陣年四十有三十年十月喪還

上輟朝三日

命親王以下二品官以上出郭十里迎

上欲親臨其喪諸王大臣力諫乃止謚曰莊十二月以其
次子尼思哈襲封敬謹親王十六年十月追論王
存日分取睿親王所遺財物及掌禮部時不効奏
尚書譚泰驕縱罪應削爵

詔以王係宗室陣亡仍留爵十七年十一月尼思哈薨時
方十歲謚曰悼十八年六月以尼堪長子蘭布降

襲多羅貝勒康熙六年二月

諭宗人府曰尼堪以親王陣亡殊為可憫

世祖章皇帝復嘗矜念仍留所襲爵又無不准承襲之

旨蘭布著封為郡王仍與原號七年八月蘭布以父陣

亡功請復舊爵得

旨蘭布著襲封和碩敬謹親王八年五月議蘭布娶輔

臣鰲拜孫女為妻詰鰲拜罪狀狡稱不知降鎮國

公十三年六月

命隨貝勒尚善討逆藩吳三桂于湖南十七年十月卒於
軍年三十有七十九年追論蘭布在岳州時退縮
罪削爵蘭布第四子賴士于康熙十八年降襲輔
國公三十五年正月

上親征噶爾丹賴士統兵赴歸化城駐守十一月師還五
十三年議賴士不安靜守分探聽消息散布流言
削爵五十四年赴阿爾吉軍前効力五十九年隨
征西將軍祁里德至額勒齊斯河擊殺賊衆議叙

得頭等功牌一雍正八年復封輔國公十年閏五月卒初賴士削爵以蘭布孫務友之子富增襲封輔國公雍正四年二月

諭宗人府曰輔國公富增人甚不及前革退賴士公爵時因無可承襲之人始令伊承襲今賴士在軍前行走數年其子伊爾登又甚勤謹竭力著將富增公爵革退與伊爾登承襲伊爾登初於雍正三年五月管武備院事九月任鑲藍旗漢軍副都統尋遷右翼前鋒統領

四年襲封輔國公六年擢正黃旗蒙古都統八年
三月攝鑲紅旗護軍統領十一月復署右翼前鋒
統領乾隆十四年四月卒謚簡恪以其第七子富
春承襲奉恩輔國公三十五年授吉林將軍四十
二年六月調杭州將軍十一月以前任吉林時不
能禁止採參議革將軍得

旨富春革去公爵另襲仍革職留杭州將軍任于是以
富春第二子賓寧襲四十三年三月

上念敬謹親王尼堪功勩頗顯且以力戰捐軀晉封賓
寧為鎮國公世襲罔替四十七年八月任正紅旗
蒙古副都統十月授宗人府左宗人四十八年五
月任鑲藍旗護軍統領

欽定八旗通志卷一百二十八

欽定四庫全書

欽定八旗通志卷一百二十九

人物志九

宗室王公傳七

贈和碩親王饒餘敏郡王阿巴泰
原封和碩端重定親王博洛

原封和碩安親王岳樂
溫良固山貝子博和託
悼愍固山貝子蘇布圖

贈和碩親王饒餘敏郡王阿巴泰

阿巴泰

太祖高皇帝第七子初授台吉歲辛亥七月

命與費英東安費揚古率兵一千征東海窩集部之烏爾
固宸穆稜二路皆取之俘千餘人還天命八年四
月喀爾喀札魯特部長昂安執我使送葉赫被戕
命阿巴泰與台吉德格類齋桑古岳託徃征之乘夜疾行
渡遼河由額爾格勒行百餘里攻昂安所居昂安
携妻子及二十餘人引牛車遁我總兵達音布先
驅追及陣歿阿巴泰督諸將繼進斬昂安及其子
俘其衆還

上行郊勞禮隨征將士分

賜所俘十年十一月同三貝勒莽古爾泰貝勒濟爾哈朗
等援科爾沁時察哈爾林丹汗圍科爾沁之克勒
珠爾根城已數日我軍至農安塔林丹汗夜遁軍
還十一年九月

太宗文皇帝即位封阿巴泰貝勒阿巴泰語額駙揚古利
達爾漢曰戰則我擐甲胄行獵則我佩弓矢出何
得不為和碩貝勒楊古利等以奏

上命勸其勿怨望天聰元年五月

上親征明錦州留阿巴泰與貝勒杜度居守十二月察哈爾昂坤杜稜來歸設宴阿巴泰語納穆泰曰我與小貝勒列坐蒙古貝勒明安巴克俱坐我上實恥之納穆泰入奏

上宣示諸貝勒於是大貝勒代善等率諸貝勒訓責之曰德格類濟爾哈朗杜度岳託碩託早隨五大臣議政爾不預阿濟格多爾袞多鐸皆

先帝分給全旗之子諸貝勒又先爾入八分列今爾為貝勒心猶不足欲與和碩貝勒抗將紊紀綱耶阿巴泰引罪願罰於是罰甲冑雕鞍馬各四素鞍馬八年五月與貝勒岳託碩託等往征明錦州敵棄城退守寧遠自十三山站以東毀堠二十一斬守者三十人獲人畜毀錦州杏山高橋三城師還上出城五里郊迎三年十月

上親征明由喀喇沁之波羅河屯行七日

命阿巴泰同貝勒阿濟格率左翼軍攻龍井關克之毀水
關入明漢兒莊副將易愛洪山口叅將王遵臣以
兵來援我兵迎擊敗之斬愛及遵臣進克漢兒庄
事詳英親王傳時右翼軍克大安口

上親統師克洪山口並趨遵化十一月敗明援兵自山海
關至者下遵化城由薊州三河縣趨通州明大同
總兵滿桂宣府總兵侯世祿屯順義縣阿巴泰與
岳託分兵擊走之獲馬千餘駝百餘順義知縣率

衆降大軍逼京城

上駐營城北土城關之東北明寧遠巡撫袁崇煥錦州總兵祖大壽以兵二萬來援屯廣渠門外阿巴泰奉命同貝勒莽古爾泰阿濟格多爾袞多鐸豪格等迎擊之聞敵右伏兵甚衆因約軍入隘趨右由正路入者與避敵同豪格趨右敗伏兵轉戰至城壕阿巴泰與豪格離由正路衝潰敵兵亦抵壕既收軍諸貝勒大臣議阿巴泰違約罪應削爵奪所屬人戶給

豪格

上曰阿巴泰非怯懦者特以顧其二子致離豪格耳朕奈何以子故加罪于兄因宥之十二月同阿濟格等略通州焚其船攻克張家灣遂與代善等從

上閱形勢于薊州敗山海關援兵五千餘事具英親王傳四年正月大兵至永平捕斬叛將劉興祚於山海關攻克永平事具鄭獻親王傳二月

上班師

命阿巴泰同貝勒濟爾哈朗薩哈璘鎮永平四月明兵自
樂亭撫寧來攻我軍之駐守灤州者擊走之事具
穎毅親王傳五年七月初設六部

命阿巴泰管工部事八月從

上圍明大凌河城正黃旗兵圍北面之西鑲黃旗兵圍北
面之東阿巴泰軍其中策應十月明總兵祖大壽
降復縱回錦州為內應

上議取錦州策

命阿巴泰與貝勒德格類多爾袞岳託率兵四千易漢裝偕大壽及降兵三百五十人乘夜襲錦州漏二鼓礮聲不絕錦州城中聞之以為大凌河圍者得脫分路來援我軍擊敗之斬馘甚衆會天大霧覲面不相識兵皆失隊伍乃收軍還七年三月監築磐蘭城五月

召宴

賜御用蟒衣一紫貂皮八馬一六月

詔問征明及察哈爾朝鮮三者何先阿巴泰奏言明之情

形

皇上已悉知之其地利臣等亦熟識之宜選精兵襲其邊
牆則關門可得

上親統大軍駐關外擇貝勒大臣分路馳入駐軍內地獲
其人可用者用之消息易得錦州無足顧慮天時
已至可令祖大壽入山海關與我兵會合攻取八
月與阿濟格薩哈璘豪格等統兵二千略明山海

關而還俘獲人畜四千二百有奇八年五月隨

上率大兵征明宣府八月同阿濟格攻克靈邱縣及王家

莊獻捷大同城南山岡

御營九年七月

諭之曰爾嘗自謂手疼似覺不耐勞苦不知人身血脉勞則無滯惟圖家居佚樂身不涉郊原手不持弓矢忽爾行動疾痛易生若日以騎射為事奚復患此凡有統率士卒之責者非躬親教演士卒孰肯專心武事騎射之

藝精于勤而荒于嬉不可不時加練習爾當努力奮勉
毋偷安旦夕斯克敵制勝能報

先帝養育之恩為國盡忠矣崇德元年四月晉封多羅饒
餘貝勒六月同武英郡王阿濟格等往征明克雕
鶚保長安嶺保薄延慶州先後克定興安肅容城
安州雄縣東安文安寶坻順義昌平遇敵五十六
戰皆捷生擒總兵巢丕昌等又遣都統譚泰等設
伏斬遵化三屯營守將我師方出闕明兵躡其後

還擊殲之獲馬百四十餘捷

聞

勅諭嘉獎

賜馬二匹九月凱旋

上親迎之十二月

上親征朝鮮

命阿巴泰駐噶海城收集邊民防敵二年二月遣兵入明

義州界捉生獲二人是月朝鮮降

上班師阿巴泰携駐噶海兵還瀋陽三年二月

上親征喀爾喀

命阿巴泰與禮親王代善等留守

盛京併監築遼陽都爾弼城五月

命治盛京至遼河大路九月同睿親王多爾袞证明自青
山關毀邊牆入四年四月凱旋

賜馬二銀五千事具睿忠親王傳九月同武英郡王阿濟
格等赴明錦州寧遠偵敵五年六月同睿親王多

爾袞等赴明義州督兵屯田有功七月同貝勒杜度等率兵設伏寧遠路殲明運糧兵獲米千石九月敗明杏山松山兵時大軍更番圍錦州受代而還十二月

命同親王多爾袞豪格貝勒杜度往代鄭親王濟爾哈朗等圍錦州六年三月以聽從睿親王離錦州城三十里駐營及遣兵還家事論削爵奪所屬戶口

詔從寬罰銀二千兩六月復攻圍錦州明總兵洪承疇以

兵十三萬來援我兵敗其三營獲馬五百七十

上親征殲敵數萬九月

駕旋留軍合圍松山杏山高橋

命阿巴泰仍與諸王更番圍錦州七年三月錦州降同鄭

親王濟爾哈朗等進克杏山回駐錦州七月從錦

州受代還叙功

賜蟒緞七十月

特授奉命大將軍同內大臣圖爾格等征明

上親送郊外十一月由黃崖口入敗明總兵白騰蛟白廣
恩于薊州破河間景州趨兗州擒明魯王朱以派
及樂陵陽信東原安邱滋陽諸王分兵徇萊州登
州青州莒州沂州南至海州凡攻撫歸順城九十
四俘獲人口牲畜九十二萬有奇還略滄州天津
三河密雲八年六月由墻子嶺班師還

上遣鄭親王睿親王等郊迎三十里

賜銀萬兩順治元年四月叙功晉封多羅饒餘郡王二年

正月

命統兵鎮守山東勦平滿家洞土賊時明福王朱由崧兵屯徐州東北遣都統準塔等往勦捷還三年三月薨年五十有八八年二月以其子岳樂襲康熙元年二月岳樂晉封和碩親王

命贈阿巴泰如其爵十年六月追謚曰敏乾隆十九年九月

命入祀

盛京賢王祠

原封和碩端重定親王博洛

博洛饒餘敏郡王阿巴泰第三子天聰九年五月
大軍由明宣府大同邊境征朔州代州應州別

命貝勒多鐸從廣寧入寧遠錦州牽制明關外兵俾毋援
山西博洛從征有功崇德元年封固山貝子隨父
阿巴泰征明延慶州凱旋預宴二年四月任議政
三年七月任理藩院承政十月

上征明寧遠

命隨豫親王多鐸分兵趨中後所明總兵祖大壽猝襲我師後衝潰我土默特蒙古兵護軍統領哈寧阿叅領阿爾津俄羅斯塞臣等與相持博洛奮勇前擊敵乃却五年五月蒙古多羅特部民蘇班代阿巴爾代等約乞降

命從鄭親王濟爾哈朗等迎之於杏山西五里臺敗明追兵

賜御廐良馬一尋與諸王更番圍錦州六年八月

上親征明錦州明總督洪承疇來援敗之松山追至塔山
獲其筆架山積粟事具英親王傳又同貝勒羅洛
渾等設伏桑阿爾齋保擊敗總兵吳三桂王樸七
年春松山錦州相繼下博洛與兄輔國公博和託
及貝子尼堪等更番駐防錦州順治元年四月隨
睿親王多爾袞入山海關破流賊李自成十月晉
封多羅貝勒隨豫親王多鐸征河南破自成於潼

闕下西安南定江寧豫親王分兵半以博洛領之
招撫常州蘇州同鎮國將軍拜音圖等趨杭州明
兵拒者皆敗夜渡錢塘江而逃我軍追至江岸駐
營敵見之以為潮且至營必沒而潮連日不至敵
驚為神明潞王朱常淂遂率杭州官屬開門降浙
西湖州嘉興浙東紹興寧波嚴州等府皆下淮王
朱常清亦自紹興渡江來歸十月凱旋

賜金二百銀萬五千兩鞍馬三三年二月

命為征南大將軍同都統公圖賴率師征福建五月至杭州時明魯王朱以海稱監國于紹興其舊將方國安等營于錢塘江東岸綿亘二百里遣護軍統領圖賴等從上流渡江分兵擊之至江濱無舟不得渡忽江沙暴漲水淺可涉大兵策馬徑渡敵大驚博洛遣貝子屯齊等繼進國安棄戰艦奔以海道台州斬殪無算擒總兵武景科等撫定紹興六月圍金華七月克之斬明蜀王朱盛濃等遂克衢州

浙江悉平明唐王朱聿鍵猶據福建我軍分常山
江山兩路並進遣圖賴等擊敗其閩部黃鳴峻兵
於仙霞關遂破浦城前鋒統領努山等擒斬其總
督楊廷清李暄分遣署護軍統領杜爾德前鋒統
領拜音岱等攻克建寧延平聿鍵先由延平走汀
州博洛遣護軍統領阿濟格尼堪杜爾德等克其
城擒斬聿鍵及曲陽王朱盛渡西河王朱盛詮松
滋王朱演漢西城王朱通簡及其官屬敵將姜正

希率師二萬來援夜襲汀州我師擊敗之斬首萬餘又遣鎮國將軍漢岱等敗敵將師福於分水關克崇安縣斬其總督楊文忠等遣副都統卓布泰等襲克福州前後二十餘捷降偽國公鄭芝龍等二百九十餘人兵十一萬有奇福建平十一月朔捷

間得

旨嘉獎是月博洛駐福州令總兵佟養甲進征廣東時唐

王朱聿鍵弟聿鏞據廣州府偽稱紹武年號養甲
等既克潮州惠州遂薄廣州克其城斬聿鏞及周
王肅眾益王思災遼王術雅鄧王器鼎鉅野王壽
鋤通山王蘊鉞高密王宏椅仁化王慈訥鄔陵王
肅訥南安王企壠周王世子恭探遼王世子儼鐸
宗室由梧慈黜等十餘人廣東平四年二月博洛
承

制以佟養甲為兩廣總督自率貝子博和託都統圖賴等

凱旋

優賚所獲金幣人口叙功晉封多羅郡王

賜王號曰端重五年十一月同親王阿濟格往大同偵防

喀爾喀至則總兵姜瓖已據城叛

命阿濟格為平西大將軍討之六年正月叛黨劉遷陷代

州

命王同承澤郡王碩塞等赴援克其鄂賊遁三月旋師大

同壤潛約助馬得勝兩路賊五千餘由大同北山

逼我營自驅騎千餘出犯王與護軍統領鰲拜徹爾布等分禦之擊斬過半北山賊竄壤亦閉城不敢復出是月睿親王赴大同招撫承

制晉封博洛為親王四月賊陷山西汾州

命王為定西大將軍移師往討五月克清源交城文水徐溝祁縣等處六月賊犯平陽王遣副都統譚布等擊敗之賊渡河遁七月賊萬餘犯絳州王遣署副都統洛碩等擊走之斬級二千餘進攻孝義委署

副將梁化鳳以火藥伏地中拔其城賊三千餘犯
壽陽王遣副都統卦喇特晉等援勦敗之斬級千
餘屢敗賊於平遙遼州榆社時有

旨令博洛酌撤閒駐兵率還京王疏言太原平陽汾州三
府屬州縣雖漸次收復而未復者尚多恐撤兵後
賊乘虛襲據應仍留守禦

上是其言令侯滿達海自朔州移師至汾州併力勦賊八
月大同降將楊振威斬環首獻英親王軍王與巽

親王滿達海合兵攻汾州九月克其城斬偽巡撫
姜建勲偽布政使劉炳業復嵐縣永寧州遣軍分
勦餘賊于岳陽縣絳州孟城驛老君廟殲之乃班
師七年二月

命理六部事八月以徇隱尚書阿哈尼堪不親往迎朝鮮
王弟事降郡王八年正月復晉封和碩端重親王
二月同諸王奏削故睿親王封爵三月以英親王
私藏軍器事隱不奏復降郡王尋

命諸王分管六部王管戶部五月復封親王八月

上察知尚書譚泰持六部權下諸王勘問王與貝子錫翰等證其罪狀伏誅九年三月薨年四十謚曰定八月以博洛第八子齊克新襲封和碩親王十二年四月仍給王號曰端重十四年正月封博洛第四子塔爾納為多羅郡王三月塔爾納卒謚曰敏思十六年十月追論博洛曾諂事睿親王分取睿親王所遺財物掌戶部時又不首劾譚泰罪削博洛

及塔爾納爵並降齊克新為貝勒十八年正月齊克新薨謚曰懷思爵除

原封和碩安親王岳樂

岳樂饒餘敏郡王阿巴泰第四子初封鎮國公順治三年正月隨肅親王豪格征四川誅流寇張獻忠五年八月

命隨英親王阿濟格勦平天津土寇十一月復隨英親王阿濟格率兵駐防大同六年九月封多羅貝勒八

年二月襲封多羅郡王

賜王號曰安九年二月管工部事十月任議政十年八月以喀爾喀部落土謝圖汗車臣汗等違

旨不還所掠巴林戶口又來索歸順同部蒙古

命王為宣威大將軍駐歸化城相機進勦尋因喀爾喀悔罪入貢撤還十二年八月掌宗人府事十四年十一月

諭獎王性行端良蒞事敬慎晉封和碩安親王康熙九年

三月

命監修玉牒十三年十月

命為定遠平寇大將軍由江西往勦逆藩吳三桂耿精忠賊黨進鎮廣東十二月抵南昌

詔移師征湖南王奏江西形勢為廣東咽喉江南湖廣要衝今三十餘城為賊盤據且吳逆造木城于醴陵置偽總兵十餘人兵七萬猱猱三千堅守萍鄉諸隘若撤撫州饒州都昌防兵往湖南則諸處復為

賊有否則兵勢單弱不能長驅且廣東諸路亦恐多阻臣欲先平江西賊無却顧憂然後分防險要移師湖南得

旨令速行整理江西要地旋奏遣副都統穆成額等擊走吳逆偽總兵張泰殺賊五千餘復安福縣又遣副都統雅賚等復都昌縣招撫康山餘賊十四年二月遣護軍統領桑格等克復上高新昌二縣陣斬偽總兵朱一典謝以泰等殺賊萬五千三月將軍

希爾根前鋒統領舒恕敗賊於撫州城南之唐埠
及七里岡四月副都統珠喇禪等敗賊于五桂寨
徐汭等處并招撫奉新都昌冷口南湖西湖銅鼓
營強山諸偽官復東鄉餘干二縣王親攻建昌抵
長興遇耿逆偽將軍邵連登水陸迎敵與定南將
軍希爾根進擊走之復建昌府城分兵破賊于石
頭街鸞石嶺泉山口遂復萬年安仁二縣閏五月
饒州陷

諭留兵守建昌速回南昌居中調度尋奏副都統珠喇禪
敗賊於武寧縣都統霍特敗賊于新城縣將軍額
楚敗賊于弋陽縣復廣信府城六月奏將軍希爾
根敗賊餘干縣復饒州又敗賊碣碑舖及景德鎮
復浮梁樂平二縣又遣前鋒統領舒恕總兵官許
真等敗賊於宜黃躡之復宜黃崇仁樂安三縣七
月奏泰和龍泉永新廬陵永寧及湖廣茶陵並就
撫九月奏遊擊周志新等破吳逆偽總兵桂芳等

復靖安九月奉

諭留兵固守江西乘冬月速取長沙十一月疏言吳逆聞
臣進取長沙必固守要害非綠旗兵無以搜險非
紅衣礮不能破壘乞令提督趙國祚屯壘都督陳
平各率所屬隨臣進討其廣東所送紅衣礮甚重
路險難致乞

敕發新造西洋礮二十具為攻勦之用得

旨勦滅逆賊平定湖南俱賴王練習宿將及精兵火器俱

不可闕提督趙國祚都督陳平并所屬官兵悉依王所請南懷仁所造火礮著官兵照數送至江西轉運王軍前王不必待礮始行亟由吉安或袁州進發王旋奏希爾根額楚等勦殺浮梁餘賊復貴溪招降偽將張輔聖等二百七十餘員十一月奏耿逆偽總兵張存遣使來告願領所屬兵八千屯順昌俟大兵進閩為內應

詔以簡親王喇布已自江寧移駐南昌閩事付之料理王

即進征長沙十五年二月王抵萍鄉分兵四路破賊寨
十二斬首萬級吳逆偽將軍夏國相遁復萍鄉遂
進薄長沙七月奏賊船集長沙城下我兵無船難
破賊長沙附近林木多請先

敕撥戰艦七十濟用並令督撫委員伐材造船

詔並如所請八月

諭曰朕聞王恢復萍鄉大創逆賊直抵長沙甚為嘉悅王
其善撫百姓俾困苦得舒至脅從叛變之人原皆朕之

臣子當加意招徠十六年正月遣副都統阿進泰等敗
偽總兵解先聲及馬棚賊於瀏陽縣十一月奉

命乘逆賊震動之時速分兵摧破楚逆取湘潭諸處十七
年正月官兵敗賊於平江縣復其城三月奏遣兵
進勦馬棚賊邱義尚於七家洞擒斬無算又招撫
偽總兵揭玉慶朱永昇等吳逆偽將軍林興珠率
偽官楊廷言等自湘潭來降九月

詔以三桂已伏冥誅賊勢漸潰宜廣示招徠速行政勦王

請自赴岳州布置舟師調諸路大礮攻賊陸營

上命大將軍貝勒察尼急圖岳州王仍圍攻長沙十八年

正月岳州偽將軍陳珀偽總兵王度冲等降于察
尼軍餘賊潰竄長沙賊亦棄城遁王入城安撫遣
前鋒叅領沙納哈等復湘潭縣賊退據衡山王遣
兵會簡親王敗賊衆衡州寶慶相繼復六月疏言
臣所統護軍驍騎每佐領下十五人蒙古兵百餘
人喇布既進取新寧臣當率每佐領兵十一綠旗

兵萬與喇布相機進勦武岡東口賊留每佐領兵
各一綠旗兵千二百及荊州水師二千守衡州留
每佐領兵各一綠旗兵一千守寶慶撥每佐領兵
各二協同綠旗兵守岳州

詔如所議行是月遣都統釋迦保敗賊寶慶之巖溪斬級
七百獲船四十餘偽總兵王熙忠偽副將陳起鳳
知府金世正等降七月王統師抵紫陽河賊結營
對岸遣提督趙國祚副將尼滿偕降將林興珠渡

河進擊護軍統領瓦岱等繞賊後夾攻賊潰棄營遁追殺二百餘偽知縣周冠陳殿颺等降進攻武岡賊帥吳國貴胡國柱等以賊二萬據隘口我軍奮擊大破之國貴中礮死賊駭竄貝子彰泰追至木瓜橋殺賊無算遂復武岡城及楓木嶺八月捷聞得

旨嘉獎十一月

命以勅印付貝子彰泰撤每佐領八人率還

京師十九年正月

上遣官迎宣

諭曰王連年以來遠蒞巖疆親經百戰櫛風沐雨歷暑逾寒競揚貔虎之雄克清梟獍之孽湖湘諸處已見蕩平滇黔餘氛俱成坐困更體朕軫念窮荒之心廣示招徠深加撫恤王師所至遐邇來歸捷奏屢宣中外稱慶朕既嘉碩畫益篤親愛命班師副朕懷想頃者聞王已抵武昌奏凱可期特遣使臣慰勞兼賜駱駝良馬以示

優眷王即按程以來朕將計日以待三月凱旋

上行郊勞禮于盧溝橋南二十里王俘偽太子朱慈燦以
來先是順治元年冬有赴明外戚周奎家自稱太
子者奎白諸

朝令舊宮人及東宮官屬辨是非真法司鞫實得太
監楊玉取劉姓子詐冒狀並伏誅康熙十二年冬
京師聞三桂反有自稱三太子朱慈瑞者偽署廣
德元年糾黨京城內外舉火作亂擒其黨于鼓樓

西街及燈市口詰以朱慈瑞云即楊起隆已遁矣
十八年秋王駐營楓木嶺土人首擒偽軍師戴必
顯無為教姚文明因獲朱慈燦于新化縣僧寺追
訊前在京城逆謀慈燦訴已係崇禎帝長子十二
歲遭闖難出奔南京後未再至北京福王由崧曾
置諸獄釋為民即往河南隨朽木和尚為僧流落
江西湖廣二十餘年因病還俗往來永州寶慶欲
聲討吳三桂悖逆反覆不忠不孝不義諸罪商之

戴必顯姚文明招兵散劄一年因三桂死中止王
疏陳請

旨因言前此屢有冒明太子事朱慈燦雖云欲討吳逆招
兵散劄但當大軍復寶慶時不即自首應與戴必
顯姚文明並論斬其曾受偽劄人已示許首繳偽
劄銷毀免罪慈燦既自稱真係明嗣當械至京辨
識得

旨朱慈燦著王帶來俟到日再議至是王移送法司令與

前繫獄之朱慈瑞逆黨對質俱不識詰其造印散
割與戴必顯姚文明謀亂屬實皆擬凌遲如律

詔並改為處斬是年秋復有託朱慈瑞之名在陝西煽誘
者擒之漢中三河口大將軍圖海械送

京師

敕法司勘訊面有刺痕實非明嗣並非楊起隆依大逆律
磔于市二十年十二月

命王仍掌宗人府事二十七年七月以噶爾丹擾喀爾喀

同簡親王雅布各率兵五百赴蘇尼特汛界駐防
十月撤還二十八年二月薨年六十有五謚曰和
以其子瑪爾渾襲二十九年禮烈親王代善之曾
孫原封貝勒諾尼訴岳樂康熙四年掌宗人府事
時偏聽諾尼姑母讒言枉坐諾尼不孝死罪繫獄
革爵蒙

皇上鑒原釋放岳樂誣陷無辜理應反坐

詔宗人府會同領侍衛內大臣察議復諾尼貝勒追降岳

樂為郡王削其謚岳樂第十五子瑪爾渾初于康熙十九年正月封世子二十九年二月襲封多羅安郡王三十五年正月大將軍征噶爾丹

命率兵往歸化城偵防四十年十月掌宗人府事四十五年二月充

玉牒館總裁四十八年十一月薨年四十有七謚曰愍四十九年二月以瑪爾渾次子華圮襲多羅安郡王五十八年九月薨年三十有五謚曰節雍正元年

十二月

諭曰向時安郡王岳樂諂附輔政大臣又自恃長輩每觸

忤

皇考蒙

聖德寬仁始終容宥而伊諸子全不知感不務竭誠効力
弟兄之間互相傾軋競爭營求妄冀得爵讒害骨肉此
衆所共知者瑪爾渾係應襲王爵之人似屬安分其子
華玘尚無劣蹟而其嗣夭折封爵虛懸是以

皇考審擇其人躊躇有待而安郡王之子伍爾占孫色亨圖等遂生怨望形于詞色夫國家恩施豈可倚恃而強邀今廉親王允禩借此逞其讒說以離間宗室舊人致朕從容施恩之本念俱不可行將襲封安郡王本章發回不准承襲舊所屬佐領撤出另撥乾隆四十三年三月以阿巴泰岳樂累著功績

賜奉恩輔國公爵世襲罔替以華玘之孫奇昆襲奇昆追封奉恩輔國公錫貴次子也是年四月授散秩大

臣四十七年七月卒年四十四

溫良固山貝子博和託

子彰泰

博和託饒餘敏郡王阿巴泰次子初封輔國公崇德元年十二月

上親征朝鮮博和託隨豫親王多鐸先驅圍其都進圍南漢山城先後敗其援兵二萬餘

上駐營城西博和託以所獲獻三年八月隨睿親王多爾袞征明由董家口入略京西南六府至山西界移

師山東克濟南四年四月凱還

賜銀二千兩六年三月隨鄭親王濟爾哈朗等征明圍錦

州七年三月錦州下圍杏山七月

命駐防錦州十月隨其父饒餘貝勒阿巴泰征明入黃崖

口攻薊州由河間景州進克兗州八年六月凱旋

賜銀三千兩十月同輔國公芬古駐防錦州順治元年四

月隨奉命大將軍睿親王多爾袞入山海關破流

賊李自成十月晉封固山貝子三年五月隨豫親

王多鐸勦蘇尼特部騰機思騰機特等有功十月
凱旋

優賜俘獲五年九月卒謚曰溫良順治六年十月封其子
佛克齊庫為固山貝子十四年十二月薨謚曰介
潔博和託第四子彰泰初于順治八年閏二月封
鎮國公尋晉封固山貝子九年四月襲父爵仍為
固山貝子康熙十三年春逆藩吳三桂陷湖南

命順承郡王勒爾錦由荊州渡江勦賊六月復

命安遠靖寇大將軍貝勒尚善往征規復岳州以彰泰叅

贊軍務十五年二月

諭責尚善及彰泰進取遲延三月彰泰與尚善議分軍水陸並進遣護軍統領額司泰等勦賊洞庭湖賊船入南津港泊君山及由岳州出犯者皆敗之獲船五十餘賊攢立柝樁于套湖峽口阻我舟大軍仍駐陸十七年六月伐柝樁棹輕舟擊賊柳林嘴發礮燬其船斃賊無數八月尚善卒于軍

詔以貝勒察尼代為大將軍授彰泰撫遠將軍九月師出
南津港賊船泊癩子山下令前鋒統領杭奇提督
桑額等進擊斃賊百餘獲船四十月復敗賊於陸
石口連營白米灘斷賊餉道十八年正月岳州賊
帥吳應麒以乏食棄城遁大兵克岳州彰泰同桑
額復華容石首二縣三月

詔彰泰會安親王岳樂軍於衡州七月由寶慶進取武岡
州賊渠吳國貴據隘拒我軍礮斃國貴餘賊潰遁

彰泰追及木瓜橋殺賊無算十一月

特命岳樂還京以彰泰代為定遠平寇大將軍十九年三月遣都統穆占總督董衛國等敗偽將軍吳應麒復沅州降靖州及綏寧縣附近各土司八月疏言將軍蔡毓榮奉有調遣漢兵之

旨今進取貴州滿漢既合兵一路若調遣不相知恐礙事
機

上詔毓榮一切軍機關白大將軍酌行閏八月自沅州進

征十月距鎮遠十五里駐營賊據大路及兩山間
結壘彰泰遣衛國等攻鎮遠衛關口穆占等截賊
旁遁隘口而自與毓榮攻賊壘賊敗潰衛國奪十
向口敗賊將張足法等于大巖門穆占躡賊至偏
橋衛賊由山徑竄遂復鎮遠府進定平越府及新
添衛直趨貴陽逆孽吳世璠與應麒等皆遁彰泰
駐守貴陽遣兵進復安順石阡都勻思南諸府十
一月復遣軍復永寧州敗賊兵于安籠鋪追勦至

雞公背山鐵索橋十二月疏言詞賊兵萬三千欲據盤江遣前鋒統領薩克察等率兵至鐵索橋等處守隘

上以大兵秣馬貴陽已月餘

諭趣彰泰親統兵撲賊進定雲南二十年正月渡盤江偵賊帥線絨等據普安縣之江西坡二月前驅至砂子哨賊拒戰敗之彰泰督兵繼進抵臘茄坡賊在江西坡者夜竄都統拉賽等追之復新興所逐北

三十里賊千餘還拒陣斬二百餘復普安州時大將軍賴塔由廣西入雲南曲靖府彰泰由普安進霑益州會嵩明州議合兵圍雲南省城距城三十里賊將胡國柄劉起龍自城內引賊萬餘列象陣拒戰彰泰軍其左賴塔軍其右自卯至午賊殊死戰彰泰密遣前鋒統領沙納哈等衝其兩旁賊兵始却大兵續進逼賊歸化寺大敗之陣斬國柄起龍及偽將軍總兵九人俘獲無算彰泰與賴塔毓

榮等近歸化寺駐營令諸軍分布近城南壩薩石
衛走馬街雙塔寺得勝橋重關等處以扼其吭仍
廣布檄諭宣

朝廷威德於是大理臨安永順姚安武定各偽官相繼
詣軍門降先是賊將馬寶胡國柱夏國相等掠四
川聞雲南圍急還救彰泰遣提督桑額都統希福
勦賊楚雄寶退據烏木山扼險以拒希福等擊敗
其衆寶越山遁至姚安知偽鎮將等先已歸順乃

乞降七月疏言馬寶等已投降夏國相黨羽解散
奔竄廣南惟胡國柱在鶴慶麗江尚未勦滅現有
都統希福提督桑額追捕臣等圍城兵力足用頃
聞將軍噶爾漢總督哈占自四川移師貴州將由
威寧來雲南恐餉不敷臣等議令哈占兵還四川
噶爾漢兵至日以廝役補缺額兵量行裁汰則糧
不多糜圍城兵亦足用得

旨令哈占噶爾漢並旋師還四川酌防要地餘並遣還京

彰泰又疏言馬寶屢經招撫不即悔罪投誠反奔
尋甸携妻子赴楚雄糾逆黨為大兵所敗窮蹙已
極始率眾不滿百人乞降莫贖其罪同時來降之
偽將軍巴養元鄭旺李繼業等應並羈禁候

旨九月希福至雲龍州國柱自縊死總兵李國樑與土司
儂朋勦賊廣南圍國相于西板橋國相降彰泰奏
其罪與寶同並械送京十月彰泰與賴塔及將軍
趙良棟等破賊營于南霸得勝橋太平橋走馬街

賊竄入城大軍環城攻世璠自縊死偽將軍何進
忠林天擎線絨黃明等出降彰泰誠軍士勿搶擄
令都統穆占瑪奇先入城撫民清理倉庫籍賊黨
屬戮世璠屍函首馳獻

闕下雲南平是年即軍前授宗人府左宗正二十一
年十月凱旋

上率王大臣至盧溝橋南二十里迎勞二十二年二月議
初征岳州遷延應以恢復貴州雲南功抵罪

命仍紀功封冊

賜黃金二十兩白金千兩二十四年九月以濫舉宗人府屬官品行不端罷宗正任二十九年正月薨年五十有五以彰泰第三子屯珠襲屯珠初于康熙十一年正月封鎮國公二十七年二月以庸懦降鎮國將軍二十九年六月襲封鎮國公五十二年授宗人府左宗正五十六年十月授禮部尚書五十七年閏八月卒年六十有一

特贈固山貝子品級謚曰恪敏初屯珠有子安詹早殤以
其兄百綬子文昭之第三子逢信嗣安詹為子十

二月

詔以逢信降襲輔國公乾隆十二年八月卒謚曰恭恪十
二月以逢信第二子盛昌襲封輔國公二十二年
七月以侍班失儀削爵二十三年二月封鎮國將
軍十二月復封輔國公


悼愍固山貝子蘇布圖

蘇布圖饒餘敏郡王阿巴泰之孫追封賢懿貝子
尚建之長子初封輔國公順治二年七月隨貝勒
勒克德渾駐防江寧十二月移師征湖廣三年正
月至武昌破流賊餘黨一隻虎等事詳順承恭惠
郡王傳凱旋

頒賚有功將士蘇布圖得

賜金五十兩銀十兩尋封固山貝子五年九月隨鄭親王
濟爾哈朗征湖廣十一月卒於軍年二十有四謚

曰悼愍爵除



欽定八旗通志卷一百二十九